

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

RJEŠENJE
**po Prijavi namjere koncentracije privrednog subjekta «Mars» Incorporated, Delawere, USA i
«Wrigley» Jr. Company, Chicago, USA**

Sarajevo
Septembar, 2008. godine



Broj: 01-04-26-016-16-II/08
Sarajevo, 11.09.2008. godine

Na osnovu člana 25. stav (1) tačka e), člana 42. stav (1) tačka d) a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), i rješavajući po Prijavi namjere koncentracije privrednog subjekta «Mars» Incorporated, Virdžinija, USA i, i privrednog subjekta «Wrigley» Jr. Company, Chicago, USA, podnesenoj po advokatskoj kancelariji Karanović & Nikolić, Lepenička 7, 11 000 Beograd, Republika Srbija, zaprimljenoj dana 08. Maja 2008. godine pod brojem: 01-04-26-16-II/08, Konkurencijsko vijeće, na 71. (sedamdesetprvoj) sjednici održanoj dana 11.09.2008. godine, je donijelo

R J E Š E N J E

1. Ocjenjuje se dopuštenom koncentracija na tržištu prodaje konditorskih proizvoda koji se prave na bazi šećera i guma u Bosni i Hercegovini, koja će nastati sticanjem kontrole privrednog subjekta «Mars» Incorporated sa sjedištem Orange Street 1209, Wilmington, Delaver, SAD nad privrednim subjektom «Wrigley» Jr. Company, sa sjedištem u North Michigan Avenue 410, Chicago, Illinois, SAD, kupovinom većine dionica.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 08.05.2008. godine pod brojem: 01-06-26-016-II/08, Prijavu namjere koncentracije (u daljem tekstu: Prijava), podnesenoj po advokatskoj kancelariji Karanović & Nikolić, Lepenička 7, 11 000 Beograd, Republika Srbija (u daljem tekstu: Podnosilac prijave), (punomoć izdata u Čikagu dana 02. maja 2008. godine od privrednog subjekta «Wrigley» Jr. Company i punomoć izdata u Slought UK, od strane privrednog subjekta «Mars» Incorporated), privredni subjekt «Mars» Incorporated namjerava steći kontrolu nad privrednim subjektom «Wrigley» Jr. Company, kupovinom većine njegovih dionica.

Uvidom u podnesenu Prijavu utvrđeno je da nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterija za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće zatražilo dopunu iste, u skladu s članom 31. Zakona (akt broj: 01-04-26-16-1-II/08 od 12.05.2008. godine i 01-04-26-016-4-II/08 od 02.06.2008. godine), nakon čega je Podnosilac prijave iz opravdanih razloga zatražio produženje roka za 15 dana za dostavu dokumentacije u skladu s članom 31. stav 2. Zakona.

Konkurencijsko vijeće je aktom broj: 01-04-26-016-6-II/08 od 10.06.2008. godine odobrilo produženje roka za dostavu preostale tražene dokumentacije, nakon čega je Podnosilac prijave u skladu sa zahtjevom Konkurencijskog vijeća istu dopunio sljedećim aktima: 01-04-26-016-7-II/08 od 13.06.2008.godine, 01-04-26-016-8-II/08 od 17.06.2008.godine, 01-04-26-016-9-II/08 od 25.06.2008. godine, 01-04-26-016-10-II/08 od 30.06.2008.godine, 01-04-26-016-11-II/08 od 27.06.2008.godine i 01-04-26-016-12-II/08 od 11.08.2008. godine.

Po prijemu tražene dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu s članom 30. stav (3) Zakona, dana 18.08.2008. godine pod brojem: 01-04-26-016-14-II/08.

Podnosilac prijave predmetne koncentracije je u skladu s članom 30. stav (2) Zakona u istoj naveo da prijavu namjeravane koncentracije ima namjeru podnijeti nadležnim tijelima u SAD, Bjelorusiji, Hrvatskoj, Crnoj Gori, Kanadi, Kini i Meksiku, a da su predmetnu koncentraciju odobrili Evropska Komisija te nadležni organi u Ruskoj Federaciji, Srbiji, Albaniji, Makedoniji, Ukrajini, Izraelu i Brazilu.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Predmetna Prijava je podnesena u vremenskom roku od 8 dana od dana zaključivanja Ugovora i plana spajanja između Privrednog subjekta «Mars» Incorporated, Delaware, USA, i privrednog subjekta «Wrigley» Jr. Company, Chicago, USA, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt «Mars» Incorporated sa sjedištem Orange Street 1209, Wilmington, Delaver, SAD i «Wrigley» Jr. Company, sa poslovnim sjedištem u North Michigan Avenue 410, Chicago, Illinois, SAD.

1.1. Privredni subjekt «Mars» Incorporated, Delaware, USA

Privredni subjekt «Mars» Incorporated sa registrovanim sjedištem u Orange Street 1209, Wilmington, Delaver, SAD, osnovan i registrovan kod Državnog sekretara države Delaware dana 08.04.1933. godine je u 100% vlasništvu fizičkih lica američke porodice Mars.

Osnovna registrovana djelatnost privrednog subjekta «Mars» Incorporated je prodaja slatkiša, hrane i proizvoda za kućne ljubimce, te pića i zdravstvenih odnosno prehrambenih proizvoda.

Privredni subjekt «Mars» Incorporated ima ukupno 293 subsidijarna društva širom svijeta i to u sljedećim zemljama: USA, Engleska, Francuska, Brazil, Njemačka, Sjeverna Afrika, Cipar, Kina, Australija, Mexico, Tajland, Španija, Argentina, Japan, Indija, Venecuela, Gana, Ujedinjeni Arapski Emirati, Čile, Bermude, Austrija, Belgija, Kanada, Češka, Švedska, Estonija, Finska, Portugal, Holandija, Libanon, Turska, Grčka, Hrvatska, Bugarska, Italija, Latvija, Ruska Federacija, Mađarska, Novi Zeland, Norveška, Slovenija, Filipini, Poljska, Rumunija, Švicarska, Slovačka, Ukrajina, Dominikanska Republika, Egipat, Gvatemala, Koreja, Peru, Kolumbija, Irska, Indonezija, Malezija, Vijetnam, Bjelorusija, Kazahstan i Danska.

Prema podacima iz Prijave privredni subjekt «Mars» Incorporated nema niti jedno povezano društvo niti je direktni ili indirektni vlasnik dionica bilo kojeg privrednog subjekta u Bosni i Hercegovini.

1.2. Privredni subjekt Wrigley Jr. Company

Privredni subjekt «Wrigley» Jr. Company sa registrovanim sjedištem u Wilmington, 1209 Orange Street, Delaware, SAD i poslovnim sjedištem u North Michigan Avenue 410, Chicago, Illinois, SAD, osnovan od fizičkog lica gospodina William Wrigley Jr. registrovan je 1927. godine pod brojem: 0224524 kod Državnog sekretara države Delaware u Wilmingtonu, Delaware, SAD.

Registrovana djelatnost ovog privrednog subjekta je uglavnom proizvodnja i prodaja žvakaćih guma, konditorskih proizvoda, prehrambenih proizvoda i drugih proizvoda s ovim u vezi.

Većinski vlasnik ovog privrednog subjekta je američka porodica William.

Privredni subjekt «Wrigley» Jr. Company ima ukupno 91 subsidijarno društvo širom svijeta i to u sljedećim zemljama: USA, Australija, Austrija, Bugarska, Kanada, Kajmanski otoci, Kina, Hrvatska, Češka, Engleska, Francuska, Gruzija, Njemačka, Holandija, Mađarska, Indija, Indonezija, Izrael, Italija, Japan, Kenija, Litvanija, Malezija, Meksiko, Novi Zeland, Norveška, Papaja Nova Gvineja, Filipini, Poljska, Rumunija, Ruska Federacija, Slovačka, Slovenija, Španija, Švedska, Tajland, Ujedinjeni Arapski Emirati, Ukrajina, Kipar, Irska i Finska.

Prema podacima iz Prijave privredni subjekt «Wrigley» Jr. Company nema niti jedno povezano društvo niti je direktni ili indirektni vlasnik dionica bilo kojeg društva u Bosni i Hercegovini.

2. Obaveza prijave namjere predmetne koncentracije

Obaveza prijave namjere koncentracije privrednih subjekata, u smislu odredbe člana 14. stav (1) pod b) Zakona, postoji ako ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 5 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40%.

Ukupni godišnji prihodi privrednih subjekata učesnika predmetne koncentracije na dan 31. decembra 2007. godine, iznose:

Tabela 1.

Redni broj	Naziv privrednog subjekta	Prihod na svjetskom nivou u 2007. god	Prihod u BiH u 2007. god
01.	Mars	(..)** ¹	(..)**
02.	Wrigley Jr. Company	(..)**	(..)**

- korišteni su podaci iz prijave

Ukupni godišnji prihod (Tabela 1.) privrednog subjekta «Mars» Incorporated, po završnom računu u godini koja je prethodila predmetnoj koncentraciji, ostvaren u Bosni i Hercegovini iznosi (..)***, a privrednog subjekta «Wrigley» Jr. Company iznosi (..)**.

Učesnici koncentracije u Bosni i Hercegovini svoje proizvode ne prodaju direktno, već putem svog distributera, privrednog subjekta «Ataco» d.o.o. Mostar, Kralja Tomislava 14, Mostar, Bosna i Hercegovina.

(..)**¹ podaci predstavljaju poslovnu tajnu

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnika koncentracije, na svjetskom i na tržištu Bosne i Hercegovine), u smislu člana 8. tačka h) predmetne Odluke.

Budući da su učesnici koncentracije ispunili uslove, u smislu člana 14. stav (1) pod b) Zakona, u pogledu ostvarenog ukupnog godišnjeg prihoda svakog od najmanje dva privredna subjekta učesnika koncentracije ostvarenog prodajom roba i/ili usluga na tržištu Bosne i Hercegovine, koji treba da iznosi najmanje 5 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40% privredni subjekti učesnici koncentracije su obavezni podnijeti Prijavu.

3. Pravni okvir ocjene predmetne koncentracije

Konkurencijsko vijeće u provedbi postupka ocjene dopuštenosti predmetne koncentracije primjenilo je odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterija za ocjenu koncentracija privrednih subjekata.

Konkurencijsko vijeće je, na osnovu člana 43. stav (7) Zakona, koristilo sudsku praksu Evropskog suda i odluke Evropske komisije, kao i kriterije i standarde iz Obavještenja Komisije o izračunavanju ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

4. Pravni osnov i oblik predmetne koncentracije

Pravni osnov predmetne koncentracije, u smislu člana 30. stav (1) tačka a) Zakona definisan je članom 8. tačka f) alineja 3. Odluke o načinu podnošenja prijave i kriteriji za ocjenu koncentracija privrednih subjekata.

Prema navedenom pravni osnov predmetne koncentracije je Ugovor i plan spajanja (u daljem tekstu: Ugovor) zaključen, dana 28. aprila 2008. godine u Delaware, SAD, između privrednih subjekata: «Wrigley» Jr. Company, «Mars» Incorporated, New Uno Holdings Corporation i New Uno Acquisition Corporation, po kojem privredni subjekat, «Mars» Incorporated namjerava steći kontrolu nad privrednim subjektom «Wrigley» Jr. Company kupovinom većine njegovih dionica u transakciji vrijednoj cca (..)**.

U skladu s članom 12. stav (1) tačka b) Zakona pravni oblik koncentracije predstavlja sticanje kontrole ili dominantnog uticaja jednog privrednog subjekta («Mars» Incorporated), nad drugim privrednim subjektom («Wrigley» Jr. Company) sticanjem kontrole kupovinom većine dionica ili udjela osnovnog kapitala.

5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda predmetne koncentracije je tržište prodaje konditorskih proizvoda, koji se prave na bazi šećera i guma .

Relevantno tržište u geografskom smislu predmetne koncentracije je tržište Bosne i Hercegovine.

Prema navedenom, relevantno tržište predmetne koncentraciji je tržište prodaje konditorskih proizvoda koji se prave na bazi šećera i guma, na cjelokupnoj teritoriji Bosne i Hercegovine.

6. Analiza relevantnog tržišta predmetne koncentracije u Bosni i Hercegovini

Tržišni udio privrednog subjekta “Mars” Incorporated i njegovih konkurenata na tržištu prodaje čokoladnih konditorskih proizvoda, koje čine proizvodi pravljeni na bazi kaka, u Bosni i Hercegovini u 2007. godini, iznose:

Tabela 2.

Red.br.	Naziv privrednog subjekta	Zemlja	Tržišni udio u (%)
01.	“Mars” Incorporated	USA	7
02.	Kraft	USA	22
03.	Kraš	Hrvatska	20
04.	Zvečevo	Hrvatska	10
05.	Ferrero	Italija	7
06.	Kandit	Hrvatska	7
07.	Štark	Hrvatska	5
08.	Nestle	Švicarska	4
09.	Pionir	Srbija	4
10.	Ostali		14
	UKUPNO		100

- korišteni su podaci iz prijave

Prema podacima iz prijave (Tabela 2.), privredni subjekt “Mars” Incorporated je u Bosni i Hercegovini ostvario tržišni udio od 7 % u prodaji proizvoda isključivo u okviru čokoladnog konditoraja i to sljedećih brendova: BOUNTY, MARS, MILKY WAY, MILKY WAY MINUTE, M&MS, SNICKERS i TWIX. Privredni subjekt “Mars” Incorporated u Bosni i Hercegovini ne prodaje proizvode ne-čokoladnog konditoraja koji se pravi na bazi šećera i guma.

Tržišni udio privrednog subjekta «Wrigley» Jr. Company i njegovih konkurenata na relevantnom tržištu prodaje konditorskih proizvoda u Bosni i Hercegovini u 2007. godini, odvija se u dva segmenta (šećerni konditoraj i žvakaće gume) i iznosi:

Tabela 3.

R.b.	Naziv privrednog subjekta	Šećerni konditoraj tržišni udio (%)	Žvakaće gume tržišni udio (%)
1.	«Wrigley» Jr. Company	25	96
2.	Pionir Subotica	17	0
3.	Zito	11	0
4.	Cedevita Zagreb	9	0
5.	Kandit Osijek	6	0

6.	Ferrero Italija	4	0
7.	Kraš Zagreb	4	0,1
8.	Perfetti Italija	2	1
9.	Ricola Švicarska	1	0
10.	Storck Berlin	1	0
11.	Aquaris grupa Hrvatska	0	1
12.	Glaxo Smithkline UK	0	0,2
13.	Ostali	20	1,7
	UKUPNO	100	100

- korišteni su podaci iz prijave

Prema podacima iz prijave (Tabela 3.), privredni subjekt «Wrigley» Jr. Company u Bosni i Hercegovini u prodaji konditoraja koji se pravi na bazi šećera i guma, ostvario je tržišni udio u segmentu šećernog konditoraja 25%, a u segmentu žvakaćih guma 96%, dok se u Bosni i Hercegovini ovaj privredni subjekt ne bavi prodajom proizvoda iz konditoraja koji se pravi na bazi kakaa.

6. Ocjena predmetne koncentracije

Konkurencijsko vijeće analizom relevantnih podataka, u smislu člana 17. Zakona, ocijenilo je da provođenjem namjeravane koncentracije neće doći do stvaranja dominantnog položaja učesnika koncentracije na relevantnom tržištu i da predmetna koncentracija neće sprječavati, ograničavati ili narušavati tržišnu konkurenciju na relevantnom tržištu.

Budući da privredni subjekt «Mars» Incorporated u Bosni i Hercegovini ne djeluje na relevantnom tržištu prodaje konditorskih proizvoda koji se prave na bazi šećera i guma, a privredni subjekt «Wrigley» Jr. Company ne djeluje u oblasti konditoraja koji se prave na bazi kakaa, nakon provođenja predmetne koncentracije neće doći do povećanja tržišnog udjela učesnika koncentracije te će sadašnji udio ostati nepromijenjen.

U skladu sa izloženim, a u smislu člana 18. stav (2) tačka a) Zakona, Konkurencijsko vijeće je ocijenilo predmetnu koncentraciju dopuštenom.

7. Administrativna taksa

Podnosilac Prijave na ovo Rješenje, u skladu s članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

8. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana primijema, odnosno objave ovoga Rješenja.

Predsjednik

Ibrica Lakišić